

LIGJ
Nr. 89/2024

PËR DISA SHTESA DHE NDRYSHIME NË LIGJIN NR. 46/2018, “PËR KONTROLLIN SHTETËROR TË TRANSFERIMEVE NDËRKOMBËTARE TË MALLRAVE USHTARAKE DHE TË ARTIKUJVE E TEKNOLOGJIVE ME PËRDORIM TË DYFISHTË”, I NDRYSHUAR

Në mbështetje të neneve 78, dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 46/2018, “Për kontrollin shtetëror të transferimeve ndërkombëtare të mallrave ushtarake dhe të artikujve e teknologjive me përdorim të dyfishtë”, i ndryshuar, bëhen këto shtesa dhe ndryshime:

Neni 1

Pas shkronjës “ç” të pikës 2 të nenit 3 shtohet shkronja “d” me këtë përmbajtje:

“d) transferimet ndërkombëtare të mallrave të kontrolluara, të cilat kryhen sipas udhëzimeve të vendeve/agjencive të NATO-s, për rastet e veçanta të nevojave operacionale të këtyre vendeve.”.

Neni 2

Paragrafi i parë i pikës 1 të nenit 9 ndryshohet si më poshtë:

“Në Ministrinë e Mbrojtjes funksionon Autoriteti i Kontrollit Shtetëror të Eksporteve (AKSHE), e cila është struktura shtetërore, përgjegjëse për zbatimin e politikës së kontrollit për transferimet ndërkombëtare të mallrave ushtarake, të artikujve dhe të teknologjive me përdorim të dyfishtë.”.

Neni 3

Pika 1 e nenit 10 ndryshohet si më poshtë:

“1. Autoriteti i Kontrollit Shtetëror të Eksporteve, me kontributet e ministrive dhe të organeve të tjera të interesuara, harton dhe propozon pranë ministrit të Mbrojtjes listën e mallrave, objekt i kontrollit shtetëror të transferimeve ndërkombëtare.

Këshilli i Ministrave, me propozimin e ministrit të Mbrojtjes, miraton listën e mallrave ushtarake, të artikujve e të teknologjive me përdorim të dyfishtë në përputhje me listat përkatëse të Bashkimit Evropian.”.

Neni 4

Në nenin 13 bëhen ndryshimi dhe shtesa e mëposhtme:

1. Shkronja “b” ndryshohet si më poshtë:

“b) ndaj subjektit aplikues ka filluar procedimi penal ose është dënuar me vendim penal të formës së prerë nga gjykatat e Republikës së Shqipërisë për:

i. veprën penale të prodhimit, mbajtjes, blerjes, transportit apo tregtimit të lëndëve plasëse, të armëve të zjarrit, biologjike, kimike apo bërthamore, si dhe kërkimit shkencor për prodhimin e armëve të shkatërrimit në masë;

ii. shkeljen e dispozitave të këtij ligji;

iii. shkeljen e dispozitave të tjera të legjislacionit në fuqi, që lidhen me rendin kushtetues dhe sigurinë kombëtare.”.

2. Pas shkronjës “b” shtohet shkronja “b/1” me këtë përmbajtje:

“b/1) ndaj subjektit aplikues ka filluar procedimi penal ose është dënuar me vendim penal të formës së prerë nga gjykatat e një shteti të huaj për:

i. veprën penale të prodhimit, mbajtjes, blerjes, transportit apo tregtimit të lëndëve plasëse, të armëve të zjarrit, biologjike, kimike apo bërthamore, si dhe kërkimit shkencor për prodhimin e armëve të shkatërrimit në masë, sipas parashikimeve të legjislacionit penal në fuqi të shtetit të huaj;

ii. shkeljen e dispozitave të legjislacionit të shtetit të huaj për kontrollin shtetëror mbi transferimin ndërkombëtar të mallrave ushtarake dhe të artikujve e teknologjive me përdorim të dyfishtë;

iii. shkeljen e dispozitave të tjera të legjislacionit në fuqi të shtetit të huaj, që lidhen me rendin kushtetues dhe sigurinë kombëtare;”.

Neni 5

Në nenin 14 bëhen ndryshimet e mëposhtme:

1. Paragrafi i dytë i pikës 2 ndryshohet si më poshtë:

“Përcaktimi i formatit të regjistrimit, si dhe të dhënat e subjekteve, të cilat duhet të regjistrohen, bëhen me vendim të Këshillit të Ministrave.”.

2. Në pikën 3 togfjalëshi “miraton vendimet” zëvendësohet me fjalën “vendos”.

3. Në shkronjën “dh” të pikës 5 fjalët “arsye të tjera për cenimin e sigurisë kombëtare.” zëvendësohen me fjalët “dyshime të arsyeshme që cenojnë sigurinë kombëtare.”.

Neni 6

Paragrafi i dytë i pikës 4 të nenit 17 shfuqizohet.

Neni 7

Në nenin 21 bëhen këto ndryshime:

1. Paragrafi i tretë i pikës 1 shfuqizohet.

2. Fjalja e dytë e pikës 2 shfuqizohet.

Neni 8

Në nenin 26 bëhen ndryshimet e mëposhtme:

1. Fjalja e parë e pikës 1 ndryshohet si më poshtë:

“Për lëshimin e licencave/autorizimeve apo të certifikatave në transferimin ndërkombëtar të mallrave, personi fizik ose juridik paraqet kërkesën *online* me dokumentacionin e nevojshëm për shqyrtim dhe vlerësim.”.

2. Pika 3 ndryshohet si më poshtë:

“3. Llojet e licencave, certifikatave dhe autorizimeve, dokumentacioni i aplikimit, formatet e kërkesave të aplikimeve, si dhe formatet e licencave, autorizimeve dhe certifikatave përcaktohen me vendim të Këshillit të Ministrave.”.

Neni 9

Shkronja “ç” e pikës 1 të nenit 29 shfuqizohet.

Neni 10

Në pikën 2 të nenit 30, fjalët “mund të miratojë një vendim” zëvendësohen me fjalën “vendos”.

Neni 11

Paragrafi i dytë i pikës 2 të nenit 34 ndryshohet si më poshtë:

“Procedurat dhe kërkesat për marrjen e autorizimit përcaktohen me vendim të Këshillit të Ministrave.”.

Neni 12

Në nenin 37 bëhen këto ndryshime:

1. Pika 2 ndryshohet si më poshtë:

“2. Formatet e raportimit, si dhe afatet e koha e paraqitjes së raporteve përcaktohen me vendim të Këshillit të Ministrave.”.

2. Në pikën 3 bëhen ndryshimet e mëposhtme:

a) në shkronjën “d” fjalët “dhe incizimet audio-video” hiqen.

b) shkronja “e” e pikës 3 shfuqizohet.

Neni 13

Pika 2 e nenit 38 ndryshohet si më poshtë:

“2. Për ofrimin e informacionit dhe dokumentacionit, sipas pikës 1 të këtij neni, subjektet e përfshira në transferimet e mallrave, që kanë marrë licencë, raportojnë sipas formateve të miratuara.

Formatet e raportimit, si dhe afatet e koha e paraqitjes së raporteve përcaktohen me vendim të Këshillit të Ministrave.”.

Neni 14

Fjala e parë e pikës 2 të nenit 42 ndryshohet si më poshtë:

“Subjekteve të pikës 1, përsëritëse të mbi dy herë të shkeljeve të parashikuara në shkronjat “a” dhe “b” të këtij neni, përveç gjobës, u caktohet si masë shtesë ndalimi i kryerjes së transferimit ndërkombëtar të mallrave të kontrolluara.”.

Neni 15

Pikat 4 dhe 5 të nenit 44 ndryshohen si më poshtë:

“4. Kundër vendimit të komisionit, të marrë sipas pikës 1 këtij neni, bëhet ankim administrativ sipas përcaktimeve të Kodit të Procedurave Administrative.

5. Kundër vendimit të zyrtarit të autorizuar, të marrë sipas pikës 3 të këtij neni, bëhet ankim administrativ sipas përcaktimeve të Kodit të Procedurave Administrative.”.

Neni 16

Dispozita kalimtare dhe të fundit

1. Deri në ngritjen e infrastrukturës së dedikuar për paraqitjen e kërkesës *online*, sipas përcaktimeve të pikës 1 të nenit 26, kërkesa për lëshimin e licencave, certifikatave dhe autorizimeve, si dhe dokumentacioni përkatës paraqiten sipas mënyrave e mjeteve ekzistuese.

2. Detyrimet e subjekteve, sipas shkronjave “d” e “dh” të pikës 1 të nenit 38 dhe shkronjës “k” të nenit 41 zbatohen vetëm për rastet e licencave që lëshohen të printuara fizikisht.

3. Të gjitha procedurat e kryera sipas udhëzimeve të vendeve ose agjencive të NATO-s për transferimet ndërkombëtare të mallrave të kontrolluara, me qëllim dhënien e asistencës shtetërore ushtarake konsiderohen në përputhje me regjimin e vendosur për transferimin ndërkombëtar të mallrave të kontrolluara dhe të përcaktuara në nenin 3, të ligjit nr. 46/2018, “Për kontrollin shtetëror të transferimeve ndërkombëtare të mallrave ushtarake dhe të artikujve e teknologjive me përdorim të dyfishtë”, i ndryshuar, sipas dispozitave të këtij ligji.

Neni 17

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miraturar në datën 26.7.2024.

Shpallur me dekretin nr. 303, datë 6.8.2024, të Presidentit të Republikës së Shqipërisë, Bajram Begaj.